

COMUNICATO n. 3455 del 20/11/2025

Ma makse innschraim åhevante von 27 bintmånat sin atz 09 hoachnach 2026

Schualdjar in auzlånt in lentar vodar Europèan Uniong un UK: ågenump di kritèrie zuarzogeba di voucher

[Cimbroy] Da provintziàl Djunta pittnan provedimént vürgelekk von vitzvorsitar Achille Spinelli un vodar asesören Francesca Gerosa hatt ågenump in auzschraib zuarzogeba di voucher zo giana zo macha a schualdjar in auzlånt in Lentar vodar europèan Redjong odar in UK. 'Z iz an initziatìf vor studjént un studjénten von zboate schualdjar von obarschualn boda innhaltn viar djar odar von draite schualdjar von åndarn obarschualn boda innhaltn vünf djar, boda bölln machan a halbez odar a gântzez schualdjar in auzlånt.

“Daz ünsar zil iz daz sèll zuarzogeba in studjént zo maga machan a raicha schual un formatìf esperiéntz in auzlånt – khütta di asesören Gerosa – 'z iz bichte übarhaup vor aniaglan studjént zo kreschra sèlbart un zo lirna di fremmegen zungen. Pitt disarn initziatìf böllbar, defatte, auhaltn formatìf esperientzan in auzlånt, nützlich zo boroata di djungen vor a lem hërta mearar internatzionàl”.

“Untarleng in gebizza un pezzarn di zung kompetentzan von djungen in an modo näüge boda innnimp alle, iz a grüntegar toal zo geba vèrt in mentschliche un professionèlln Ressource guat zo pezzra in gântz kulturàl, sotziàl un produktìf sistèm von Trentino” hatta khött darzuar dar vitze vorsitar Spinelli.

Di initziatìf steat drinn in da provintziàl stratedjì, pinn zil, in da mittl-lång zait, zo pezzra di kompetentzan in di fremmegen zungen von studjéntn un studjénten vo alln in schualn, gloabante ke vürvüarn da kulturàl, ekonomesche un sotziàl identitét von Trentino makmaz tüan machante krescharn di kompetentzan un soinate guat zo reda a livèll européo un internatzionàl un vor daz sèll khemmenda augehaltet dise formatìf esperientzan in auzlånt, grüntlich zo kreschra sèlbart un zo lirna sachandarn boda dena bartn khemmen guat innzotreta in di bèlt vodar arbat o.

VOR BEM

'Z mangda nemmen toal di studjént un studjénten boda:

- gian in ditza schualdjar 2025/2026 in da zboate klasse von obar schualn boda innhaltn viar djar odar in da draite klasse von åndarn obarschualn boda innhaltn vünf djar in schualn institütt von Beleschlànt;
- boda hãm mindar baz 20 kompìrt;
- boda hãm soinate vonsitz in di Provìntz vo Tria;
- boda lai lem in di Provìntz vo Tria (dar studjént boda lebet da mocht gian in an schual institütt von Trentino);
- boda, azpe ekonòmesche livèll, gehöarn inar famildja pittnan ICEF “Famildja” boda auzkhint von sèll boda khint gebunnt un von sèll boma hatt in djar 2024, geroatet åhevante von 15 von herbestmånat 2025, gelaich odar mindar baz 0,83.

BO

A schuldjar in an Lânt vodar Européan Uniong odar in UK.

INNHALT

Ma mage nemmen toal vor a gântzez schuldjar (daz mindarste 240 tang) odar vor a halbez (daz mindarste 110 tang).

BIA INNZOGEBA DI VORSCH

Di vorsch zo haba in schütz bart mochan khemmen inngètt, lai durch di protzedùr online, vo di zene mòrgas von fintzta 27 bintmånat 2025 sin mittartage un halbez von vrait 09 hoachnach 2026 garade vodar websait: www.provincia.tn.it/fse+ .

'Z gèlt untargelekk servìrt zo zala bazta khint gezért zo herbega di studjént in auzlânt, anvétze zornìrn baz vor schual zo giana zo macha steat zuar in studjéntn un soinen famildje. Di schütz boda bartn khemmen zuargètt bèksln nâ in belz auzlânt ma geat zo studjara un vor biavl ziait (a gântzez schuldajr odar a halbez) un bettana ICEF “Famildja” ma hatt.

Dar auzschraib zo giana zo studjara in auzlânt in Lentar vodar Européan Uniong odar in UK steat drinn in Progråmm FSE+ 2021-2027 vodar autonome provìntz vo Tria gezalt vor in 40% vodar Européan Uniong/sotziål européan plus Font, un vor in 42% von belese Stato un vor daz sèll boda hintarsteat dar 18% vodar autonome Provìntz vo Tria.

In gântzan soinda khent untargelekk 600.000,00 euro boda zuargem zo zala schiar sèchtunsèchtzekh schütz studjo.

Zo haba in informatziongen:

Struttura Multifunzionale Territoriale Ad Personam

Bege Pranzelores, 69 – 38121 Tria

Von menta an vrait 8.30 – 17.30

Grümma Nummar : 800 163 870 – fax 0461 390707

websait: www.provincia.tn.it/fse+

Übarsetzt von Schaltarle vor di zung von Toalkamou vodar Zimbar Hoachebene

(cdt)